

# 140 staf Jabatan Canselor UMS laksana kerja amal

DE 11.2.2014 ₪  
MEMBAKUT: Keinginan untuk menabur bakti kepada masyarakat menjadi pendorong kepada seramai 140 kakitangan Jabatan Canselor Universiti Malaysia Sabah (UMS) untuk melaksanakan kerja amal di Kampung Binsulok, di sini.

Antara pengisian program yang bertemakan 'Amal Bakti Membawa Berkat' itu termasuk membaik pulih surau, perpustakaan, bilik darjah Kelas Agama dan Fardhu Ain (KAFA) serta bangunan Sekolah Kebangsaan (SK) Binsulok.

Selain melaksanakan baik pulih dalam program selama sehari itu, pihak Jabatan Canselor UMS yang diketuai Noman Ahmad turut menyumbangkan kelengkapan meja komputer untuk kegunaan murid-murid di SK Binsulok.

Paling menarik, program berkenaan juga dihadiri Adun Membakut, Datuk Ariffin Ariff yang meluangkan masa untuk memberi sokongan terhadap program yang turut disertai masyarakat setempat itu.

Dalam pada itu, Ariffin yang juga Pembantu Menteri di Jabatan Ketua Menteri menyarankan 'Institut Pengajian Tinggi (IPT) tempatan agar dapat mengadakan lebih banyak lagi program seumpamanya khususnya di kawasan luar bandar.

"Usaha Jabatan Canselor UMS ini amat dihargai dan wajar diteruskan terutamanya di kawasan luar Bandar bagi membuka minda penduduk setempat tentang betapa pentingnya budaya bantu-membantu dalam kalangan kita.

"Program seumpama ini juga

secara tidak langsung mampu mengukuhkan hubungan di antara masyarakat sekitar, termasuk badan bukan kerajaan (NGO) yang terlibat dalam usaha berbentuk amal bakti ini," katanya.

Sementara itu, Noman yang ditemui berkata, pihaknya akan memperbanyakkan lagi program seumpama itu dan turut bercadang untuk memperluaskannya ke seluruh daerah di negeri ini sebagai menunaikan tanggungjawab sosial.

"Kami akan perluaskan program ini ke beberapa daerah seperti Papar, Beaufort dan Sipitang, malah usaha murni ini juga akan mendapat kerjasama daripada NGO bagi menarik minat masyarakat untuk terlibat dalam program tersebut," katanya.

-Iskandar Dzulkifli